



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 7 Yangia anidakangma : Tir Yimyim tir_yimyim

tir yimyim TAPAK 8



Joe Biden-i tatembang o jembidang taka-taiter dak ranglok



Sitanshu Kotak India batting coach kumogo

VOL. XXII ISSUE NO. 93 (ADOK 93) DIMAPUR ROGONÜ (FRIDAY) AENJETI (JANUARY) 17, 2025 ₹ 5.00

AHODs/HODs senden nung shisa tajung lemsateptsü ayongzük

Dimapur, Aenjeti/January 16 (TYO): Administrative Heads of Departments (AHODs) aser Heads of Departments (HoDs) pur taküm asoshi mezüngbuba senden January 16, 2025 nü Nagaland Civil Secretariat Conference Hall, Kohima nung mena liasü.

Chief Secretary, Dr. J. Alam, IAS ajanga iba senden tenzüka jembidang metokmeperei aser tayongzükba balala liaka 25 buba Hornbill Festival mapang mapa tajung inyakba asoshi department ajak nem tenüsang agütsü.

Hornbill Festival mapang traffic ketdangsuba, mürekmejuba, power aser tzü amala facility balala agütsüba ya taoba-taoba küm dang tajungba liasü, ta pai ashi.

Taoba küm December ita New Delhi nung Ato Kilonser Narendra Modi lenisüba nung Chief Secretaries' Conference agi lemsatepa liasü aser iba mungdang nung Nagaland-i rongsenketzüng aser tourism sector nung rangloker presentation agütsü, ta pai ashi.

Nüburtem dang Japan nung oshi sayuba Center of Excellence in foreign languages amenokba atema ato kilonser aser danga state temia jangratema reprang, ta Dr. J. Alam-i ashi aser iba

Center ulushia Naga nungger aika skills anguba nung yaritsü imlaba lemsatep.

CS-i AHODs ajunga dang pepei department attendance tajungba kumdakja nübur nem service tajungba nung agütsütsü ayongzükba liasü.

Aruya aliba Budget Session atema jembidang Dr. J. Alam-i department ajunga dang budget proposals atema shisatsü tajung lemsateptsü ayongzük aser nüburtem nem services tajungba agütsü temelenshi tajung adokdaksüba tasa aser sentong sorkari nüngdaker, ta ashi.

Pai department ajunga dang hopta ka tsüngta Finance department nem sentong tajung aser tasentem asateta agütsütsü ashi.

CS-i AHODs aser HoDs tem dang teti pei websites tem update süa ketdang asütsü ayongzük.

Kasa senen nungsa aruya aliba budget session dak sendakba nung Additional Chief Secretary & Finance Commissioner, Sentiyanger Imchen, IAS ajanga department tem dang pei department inyakyim nung nüburtem dak rangloker sentong tasen apiteta inyaksü ajungshi.

Iba senden nung Home Commissioner, Vyasan R. IAS menden liasü, kong AHODs aser HoDs temi pei tangatetba lemsatepa liasü.

Mokokchung nung Naga nungger Dobashi-tem inti mungdang kadagi



Mokokchung nung Naga nungger Dobashi-tem Inti senden mezüngbuba sentong nung Chief Host aser Mokokchung Deputy Commissioner Thsüvesie Phoiji (Abelen) aser Kohima District Dobashi-temi (Achiji) sobaliba ken ka atendang tangokba noksa nunggi angur.

Mokokchung, Aenjeti/January 16(TYO) : Naga limai British nungger marudang Nagas of Nagaland otsüji reprangdangra Naga nungger temi timtem jenti ajangshia ali,saka iba mapang nungjia Naga nungger longjem longjema dang liasüta tanu Nagaland Dobashi Association 22nd Triennial Conference cum 63rd Anniversary sentong nung Chief Host aser Mokokchung Deputy Commissioner Thsüvesie Phoiji- i jembidang ashi.

British nunggeri Dobashitemji nüburi tamang katettsüsa aliba nübu shimteta temelung lemteta mapa nungloksü,iba meraket jenjangji mesamadaksütsüla, Dobashiji sorkar aser tenük, tenarong, tetsüng aser teka lir,anungji sorkar aser nübur tenzüksü asoshi nenok dak nüburi tamang katettsüsa litetba taküm kaka asütsüla Chief Host-

isa adenshia aliba Dobashitem ayongzükba ashi.

Dobashi tasenpur aika lanur zünga shia meteter aita angudang kanga dang temelungchia bilemer, nenok libaliro,achi ajemba nung kanga dang azüoka alitsüla.Nagaland-i temelenshi aruogo,Dobashi mapa ya kobika alitsü asenoki meteta mali, tarutsü lanu putu mapang nungbo Dobashi melen tanga ka arutsüa meteta mali,aji saka tanu nenoki inyaka toktsüba nunggi ajemdaker aotsü asünung nenoki kanga shisa kaa inyakangta Mokokchung Deputy Commissioner Thsüvesie Phoiji- isa ashi.

Sentong nung Tsüngrem lenisüba jazüka Chang Baptist Church,Mkg.Town Pastor Limanunglai sarasadema tenzüük aser asür nem akhüm agütsü liasü iba den Kohima District Dobashi

ajanga sobaliba ken ka aten,Nagaland Dobashi Association Tir Vikheho Sema, GB Association,Mkg. Tir Along Jamir parnokia shilem balala agiba den Sumi Baptist Church,Mkg. Pastor Hollohon Yepto ajanga sarasadema sentong tembann aser Dist.Head Dobashi Mkg. lenisüba nung sentong agi.

January 17 nü sentong ana agitsü renema lir,mezüngbuba sentong nung Special Guest Deputy Chief Minister Shri.T.R.Zeliang aser Chieftian Commissioner Nagaland Shri.K.S.Anden Konyak,I.A.S tenati tongti shilem agitsü aser tanabuba sentong nung Honoured Guest Advisor Law & Justice & Land Revenue Shri.T.N.Mannen (Retd.I.A.S)-i shilem agitsü aser menden melentepba sentong renema lir.

Taoba konang nung dang lidi süra tang aser tarutsümaongkamagiteti süidaksütsü:B.Asangla



B. Asangla, GM, Industries Department

London Olympic nung shilem agi. Iba tzükong nungi international level tashi tongtetba ya Tsüngremer maongka ulura. Aji oda, tsüraburi toktsüba tsüngsü nung asenoki koba tashi anitaker aser tanü saisabong luyim nung asen Aor jenjang koba nung lir, ta tasüngdangba ka lemsatep.

Aor nem "land of pioneers" ta nüngja agütsü lir, mezüngpur rongnung iba tzükong nungi aika adokogo, E.W Clark asen tzükongi mezüng aruba yaa Tsüngremer sentong lir, samanir adokdak aser tenüng tajung aika abenba tzükong. Tanü putu nunga asenoki iba konangji maneni bener oteter moteter, ta laisa asüngdanga liasü.

"Peisasa inyaktetba aser merangbabo mali, pei-i shilem agibabo mali sür tesüiba takok konang nung asenok talangka alir", ta lai tajitetba ka lemsatep. "Tesüiba konangtemjia tim nungbo tenüng sangteptsü saka yangji dang lidi süra tanü maongka magitetba den tarutsü maongkajia süidaksütsü", ta laisa shisem.

(Maneni tapak 2 nung...)

Khar yim, 12th JAN (TYO): Jan 15 aonung nungi tenzüka Jangpetkong Kaketshir Telungjem Mungdang (JKTM) pur 54 buba inti mungdang "Tayimjem Libaliyim (encompassing ethical values)" omen dak rangloker yangi Khar yimdak mungdaki.

Jan 17 nü saisabong tetoktepa sentong lapoktsür Wt. B. Asangla, General Manager, Industries Department, Mokokchung-i jembidang, 1948 nung JKTM tenzüka küm tsürabur Dr. T. Ao-i Indian football team pa lanisüba kübok

NFHRCC, Ao Senden, Lotha Hoho aser Sumi Hoho senden amen

Dimapur, Aenjeti/January 16 (TYO): SASCI künok tang teyangludak Foothills lenmang dak sendakba nung NFHRCC, Ao Senden, Lotha Hoho aser Sumi Hoho telungjem shisadokden senden ka Mokokchung nung January 16, 2025 nü mena liasü.

Iba senden nung tatsü-talang ajak jemi aser pangzüng kar yamai renema ayu:

* 2013 küm lemteta aliba ama, Foothills lenmang yangluba dak sendakba nung kija/kidong/yimsüng kecha nema compensations magütsütsü ta nenshia renem. Yangji

aibelener lira Hoho tem den Committee ajanga tapet mera agitsü.

* SASCI kübok Foothills lenmang yanglutsü atema work order nung aliba Contractors/Firms ajungai kechi südir süaka iba osang sangdonger anogo asem tsüngta (tetetzü January 20, 2025 tashinung) Committee den Implementation agreements züluteptsüla aser aji meinyakra iba firmnem iba Hoho asem tawabangba kübok mapa inyaksü memelatsü.

* Latetja aliba mapang Committee den Implementation agreement mezülutepra, Hoho tem den Committee ajanga concerned Department dang tekeraba nung worker order thitsütsü aser langa aliba firms nem work order tasen agütsü iba project asangsang kumdaksütsü ajungshitsü.

Mapa inyaksüba mapang tatem leni arur, anungji koda masüba tensa tia kar ajurura, aibelenba Firms/ Contractors temi Naga nübur dang telangzüba agütsütettsüla, ta iba senden nungsa lemteta liasü.

Naga nungger lungjemer tashi ita nokdaksüla: Advisor Sukhalu

Dimapur, Aenjeti/January 16 (TYO): Tsüngkamnyu cum Mini Hornbill Festival tenzüker ananü buba Yimkhiung Heritage Pungro, Kiphire nung January 16, 2025 nü munga liasü, kong Advisor, Food & Civil Supply, Legal Metrology, K.T Sukhalu ya sentong akhumdong ka ama aden aser Advisor, Home Guard & Civil Defence, Fire & Emergency Services, S. Kiusumew ya host ama liasü.

Advisor K.T Sukhalu-i iba sentong nung jembidang Tsüngkamnyu benjong ya asen

nüburtem aser sobaliba benjongba mapang ka lir ta ashi.

"Naga nungger ya community ka ama külemi küm aika liyonga arur aser ano maneni adianu aser adianutsür ama tanüla kasa nung alitsüla. Asenoki tarutsü tia nung rangloksüla aser yimchiyimjung aser terenlok atema bilemetsüla, aser community ka ama asen tia yanglutsüla," ta pai ashi.

Koba kin sa südir süaka asen benjong ajak nung nübur ajungai shilem agir, anungji tiaüzü ajanga telemsa madokdaksütsüla aser Naga kin tashi taitba nung

lungjemer nokdaksüla, ta Advisor K.T Sukhalu-i ashi.

Tang kanga kera ainba lima nung shisaliok ya tangsa tongtipangba kumogo, ta pai ashi.

Kaket shisatsü aser degree anguba kisüng ya tongtipang masü saka takum nung takok angutsü aser mapa angutsü atema technical skills-a nüngdaker. Kasa mapa asoshi asen den akoshia zünger million aika tokteptsü, anungji temulungtetba tulu nung bendanga agütsür meranga inyaksüla, ta pai lanurtem ajungshi.

(Maneni tapak 2 nung...)

NBSE aser PARAKH na longjemer workshop ka ayongzüka agi



Maths aser Science tesayurtem atema workshop agiba mapang tangokba noksa nung angur.

Dimapur, Aenjeti/January 16 (TYO): Nagaland Board of School Education (NBSE) aser Performance Assessment, Review, and Analysis of Knowledge for Holistic Development (PARAKH) na longjemer Mathematics aser Science tesayurtem atema anogo asem asoshi "Capacity Building for Preparation of Cadre of Professional Paper Setters" dak sendakba nung workshop ka ayongzüka agiogo.

Iba sentong ya AIDA Training Centre, Don Bosco Campus, Dimapur nung January 13 nungi 15 tashi Dimapur, Chümoukedima, Niuland, Peren aser Mon district tem atema agia liasü.

Ajak senteper Mathematics tesayur 49 aser Science tesayur 44-i shilem agia liasü.

Mezüngbuba anogo ana atema shisalen sayurji Open Door Education and Kamal Gurnani, Open Door Education

Co-founder Abhishek Kariwal liasü.

Open Door Education koba Bangalore nung amendaka lir, parnok linük kübok school balala den inyaka arudar. Parnoki kanga aroka bilemdangtsü atema kaketshirtem nem teyari agüja arudar.

NEP 2020 ya rote learning nungi pila conceptual understanding ajanga angazüktsüba dak rangloker lir. Iba temelenshi ya adokdaksütsü atema tongtibang jenjang kaji curriculum nung Competency-Based Questions (CBQs) tem bendenlokba ya lir.

Taoba mapang tasüngdangbatem ama masü CBQs ya kaketshirtemi parnoki angazükba benshitsü atema tashi asadangtsüba dak rangloker lir aser onük ajak ya information set ka ama masü saka tasa ka ama agir.

Item tasüngdangbatem nukjidong tongtibangtibaji,

kaketshirtemi tebilemstütem bentettsü atema parnok shisatsü aser tasa amshir mamshir aji asadangtsü asoshi lir.

Tasembuba anogo atema shisalen sayurji PARAKH, NCERT, New Delhi nungi Priyanka Singh aser Vivek Gupta na liasü. Tenati "Question Paper Standardisation" dak rangloker tangazükba agütsü.

Tenati Equivalence of Boards Report results, Characteristics and Foundations of a Balanced Question Paper, Steps to develop a Balanced Question Paper, Preparation of Assessment Design aser Question Paper Blueprint amala onüktem ayimjema jembia liasü.

Kasa sentong ya Kohima, Tseminyu, Wokha, Mokokchung, aser Phek district nungi tesayurtem atema SIEMAT, SCERT, Kohima nung January 16 nungi 18 tashi agitsü aser shisalen sayur kasa dang asütsü.

Republic Day atema Dimapur nung senden amen

Dimapur, Aenjeti/January 16 (TYO): Taruba Republic Day amungtsü atema sentongtem tembanga renemtsü asoshi Additional Deputy Commissioner, Dimapur, Zakabo V. Rotoka-i January 16 nü senden ka ayongzüka menogo.

Iba senden ya DC Conference hall, Dimapur nung mena liasü. Senden nung sorkar department balala tekolaktem, lokti tentet balala nungi lenirtem aser tanga stakeholder temi shilem agia liasü.

Senden nung Republic Day

sentong atema tatongi sensak asem kong amentsüba, security inyakyim, sobaliba saya balala aser logistical teyari ajak densema liasü. ADC-isa, iba sentong kecha tetsükdaksü makai amungtsü atema department balala tsüngda sendaktepa inyaksü koda tongtibang iba indang lemsatop.

Main venue, decorations, sound systems, aser sabang achayangtsü atema department balala nem nonglokja liasü. ADC-isa, welcome gate yangluba aser sobaliba sentong balala aser parade contingent

tem rehearsal indang asadanga liasü.

Sentong amungba mapang kecha tetsükdaksü matoktsü atema security akang akanga ayutsü law enforcement agency tem nem tetuyuba agütsüogo. Maneni sentong agiba mapang tetsükdaksü balala ajangshitsü akok ta bilembatem bentettsü atema sentong balala sensaksema liasü.

Maneni ADC ajak longjemer inyakba ajanga Dimapur nung Republic Day ya takok ngua amungtsü imlaba lemsatopa liasü.

Mokokchung DPDB senden January 20 nü amentsü

Dimapur, Aenjeti/January 16 (TYO): Deputy Commissioner (DC) aser District Planning and Development Board (DPDB) Mokokchung Vice - Chairman,

Thsuvisie Phoji-i sangdong ka ajanga ita shia amenba DPDB senden January ita atema January 20 nü 11 ako nungi tenzüka Deputy Commissioner's Conference

Hall, Mokokchung nung amentsü ta metetdaksüogo.

Board züngsem ajak iba senden nung tamakok maludaksüi arua shilem agitsü DC-isa metetdaksüogo.

Taoba konang nung dang lidi süra tang... (Tapak 1 nungi...)

"Vision Mokokchung 2040" ta sür luyim balala nungi tashi-temetertemi nukla balala pezüa kakat zülüja kar. Iba dak ajemdaker Mokokchung District Badminton Association-ibo 2040 tashi nung Olympic nung badminton asayar adokdaksütsü nukla yur tang agi asayameyang tenzüka angazükter. Aji oda, asenokia iba nuklaji nungittsü tim, ta lai ashi.

Khen jangraba aser bilemba agi dangbo alizüng metongtetsü, anungji, tejakleni aotsü asoshi nukla akaba den lanurtem asoshi

saisabong tsütsü asalentong tajung kar tenzüksü merangtsüla, ta laisa inyakdaksünüba o ka lemsatop.

Dr. T. Ao-i Olympic nung shilem agir küm 76 sülen Hokoto Hotozhe Sema-i asen lima asoshi konang nüngsang bener arutsüogo. Matamabener kadi timtem jenti liaka item ajakji ajangteta iba jenjang tongtetba ya atamata masü. Pai iba jenjang tongtetba ya "temulungtetba" ayuba yong lir, anungji, koba mapa südir süaka alizüng

atongtsü asoshi temulungtetbaji kanga tongtibang, ta laisa shisem. Dr. T. Ao-i jenjang ka pipoka yutsü aser Hokoto-i pa tsüngsü nung anitakba ama temulungtetba yur merangtsü laisa ayongzük.

Iba saisabong tetoktetpa nung unit 10 nungi tebur/tetsür na prongla volleyball asaya-a liasü. Takoker nem senpet sen den kuli kakat agütsü aser nija senpet - best player, best spiker aser best setter-tem shima senpettsü. JKTM inti sentong January 17 aonung tembangtsü.

Angh La Ganesan-i Mimkut benjung salem lemsatop

Dimapur, Aenjeti/January 16 (TYO): Nagaland Angh La Ganesan-i sangdong ka ajanga Kuki nungertem den Mimkut benjung salem lemsatopogo.

Tenüngsang agütsüba, telongjem aser asüngsashiba benjung amungba ajanga nenok takümshia nung temaotsü, yimjiyung aser tepela bener arujang ta imlaja atar, ta Angh-isa ashi. Aluroba

aser asen tetsü tebutem nem aküm tetushi agütsüba mapang asenoki telongjem, tesunep aser sobaliba maneni temaba jenjangi ajungketti.

Mimkut benjung amungba ajanga asenok tera mamatoktsü, tesendaktep akangshitsü aser tarutsü tajungba ka atema inyaksü ajungmesoti, ta Angh-isa shisem.

Mkg DC-i 76buba Republic Day indang metetdaksü

Dimapur, Aenjeti/January 16 (TYO): Mokokchung Deputy Commissioner Thsuvisie Phoji-i, Mokokchung nung ata aliba sorkar tenzüker ajak dang 76buba Republic Day ya January 26 nü 8:40 ako nungi tenzüka Imkongmeren Sports Complex, Mokokchung nung amungtsü ta metetdaksüogo. Anungji sorkar tenzükerterem ajak iba sentong nung tamakok maludaksüi arua shilem agitsü tetuyuba agütsüogo.

Maneni District nung office tekolak ajak dang pei staff tem attendance agitsü aser sentong tembangba sülen shitak sign sür aliba attendance sheet ya rostrum tesülen in-charge nem

agütsütsü tetuyuba agütsüogo.

Tanga tetuyuba ka nung Mokokchung DC-i village council züngsem, Ungma, Mokokchung, Chuchuyimpang, Khensa GB union, Mokokchung jila GB tem, kiyong 18 nungi lenirtem aser Mokokchung jila nung aliba nüburtem dang 76buba Republic Day sentong ya January 26 nü 8:40 nungi tenzüka Imkongmeren Sports Complex, Mokokchung nung agitsü ta metetdaksüogo.

Sentong dak sendaka alirtem aser Mokokchung jila nung aliba nüburtem dang iba sentong nung shilem agitsü mepeshia metetdaksüogo.

Phek nung Sükrünye benjung tembangogo

Dimapur, Aenjeti/January 16 (TYO): Phek nung Sükrünye benjung January 15 nü tembangogo. Iba sentong nung Minister for Road & Bridges G. Kaito Aye alakteta jaoker liasü.

Sentong nung o jembiba mapang G. Kaito Aye-i sentepa aliba lokti dang Sükrünye benjung densema benjung balala amungba tenüng nung Naga nunger yongtsü nung telongjem adokdaksütsü ayongzük.

Paisa, Khristan yimsü maruba mapanga taitoktetpa ajanga telongjem, temeim aser katika taoba ta bilemtepa liasü, ta ashi. Anungji pai Chakeshang nungertem dang maneni longjemer alitsü aser Naga nunger asoshi tatishitsü ka asütsü ayongzüka liasü.

Pai ashiba agi, telongjem maliba ajanga tanü tashi Naga nunger kin balala atema oshi ka mali. Kaito-i, nüburtem dang telongjem asoshi ola ka adoktsüji Naga nungertem asoshi tang ajak dang tenüngdaktiba lir, ta ashi.

G. Kaito-isa, state sorkar tenüng nung Chakeshang nungertem den Sükrünye benjung lemsatop aser Sükrünye

Mini Hornbill Festival 2025 takok ngua ayongzükba atema Phek Town Public Forum nem tenüngsang agüja liasü. Kasa mapang nung pai, Nagaland nung aliba kin ajak atema Mini hornbill festival ayongzükba agitsü asoshi senotsü teyari agütsüba atema state sorkar dang pelaba lemsatopa liasü.

Sentong nung lokti pela agizükba o jembiba mapang Sükrünye Host, Kuzholuzo (Azo) Nienu, MLA aser NPF Legislators leniri nüburtem dang asen sobaliba ajanga kati ka meimteptsü aser kaketshir aser lanurtem dang ochi shia alitsü aser taküm liyonga aotsü atema meranga inyaksü ajungshia liasü.

Azo Nienu-isa, taküm Sükrünye benjung kanga meraketa ayongzükba atema Phek Town Public Forum aser Phek Town Council nem tenüngsang agüja liasü.

Sentong nung Jericho II Ward aser New Ward nati sobaliba tsüngsang saya aser mi apudetba, sü atakba, Matchbox Bean Game aser Greased Bamboo Pole Climbing amala sobaliba asaya balala asaya liasü.

Naga nunger lungjemer... (TAPAK 1 NUNGIN...)

Kasa mapang pai tsüraburtem dang takum nung takok angutsü asoshi tanurtem dang nungdakba yimya tajung sayutsü ayongzükba liasü.

Tanü-asüng tebilemstü tulutibaji osang meshidak prokshiba ya lir, koba teti liasü, saka social media tali amshiba ajanga tali tamajungba kumogo, ta ashi.

Artificial intelligence den menüngdakba telok ajanga osang tiazü prokshir, anungji amangtsü aser prokshitsü atema aseni kumdanga

shimtsüla. Shisaliok tamendak dak ajungba ajanga asenoki osang tiazü aser shidak bendangtetsü, ta Advisor Sukhalu-i ashi.

Asenok mela-mela dangar nem mashi lenmang nung anisadaksüra asenoki kodanga takok mangutsü, yimya aser dangar menütsüba sülen aseni tenük amor anidakra asenok kodanga lenir makumtsü, Naga nungeri asen tarutsü tia lemtettsü asünungbo, asenok tanüla aser shisatsü tashi ita alitsüla, ta paisa ashi.



January 16, 2025 nü Rashtrapati Bhavan, New Delhi nung Singapore Tir, Tharman Shanmugaratnam agizükba sülen pai osangbenertem den jembidang tangokba noksa nung angur. Kasa noksa nung Ato kilonser Narendra Modi aser Tir, Droupadi Murmu nata angur.

BSF aser Bangladesh sepai ketdangsertem senden amentsü

New Delhi, January 16 (Agencies): Bangladesh nung Sheila Dikshit-i aniba sorkar atsüngdokba aser arrtsülen tensa raksaba sülen tang mezüng February ita tasembuba hopta nung Delhi nung Border Security Force (BSF) aser Border Guard Bangladesh na tsüngda director-general-level nung senden amentsü.

Union home ministry-i, iba senden nungji arrtsü nung atsü atsüba onük, linük ana tsüngda tesendaktep mejungi aliba aser ozüng alema arrtsü adena aitba onük süoka o lemteptsü

tebilemba lir, ta metetdaksü. "Bangladesh-India arrtsü nung, talisa Bengal sector nung BSF-i atsü atsüba ya BGB sepaitemi ashishir. Onoki iba onükji süoka jembitsü," ta home ministry nung ketdangser kati ashi. Taoba Amongnü Bangladesh yimtiba, Dhaka nung Muhammad Yunus-i aniba interim sorkari Indian high commissioner Pranay Verma jaoka liasü. Parnoki Verma dang, temelaba makai BSF-i ai aketba atsü atsütsü meranger, ta metetdakja liasü. Tasüngnü India-i Delhi nung

acting Bangladesh high commissioner, Nural Islam dang, atsü atsüadang lateta aliba inyakyim ajak shidak benshiogo, anungji tamalen lemtetba ama Bangladesh-i inyaksü aser arrtsülen ozüng alema inyakba mapatem nokdangtsü atema Bangladesh-i amalitepa inyaksü onoki imlar, ta metetdakja liasü.

Osang angazükba agi, yaküm August ita nungi December ita tashi nung BSF sepaitemi arrtsü adena aittsü meranger Bangladesh nunger 1,956 puogo.

Aluyimer 101 Shambhu arrtsü nungi Delhi-i apusotsü

New Delhi, January 16 (Agencies): January 21 nü aluyimer 101 Shambhu border point nungi Delhi-i apusoa aotsü aser minimum support price (MSP) den külemi takhangba balala agütsütsü, ta Brihostibarnü aluyimertem lenir, Sarwan Singh Pandher-i metetdaksü.

Yaküm December 6, December 8 aser December 14 anogotem nunga aluyimer 101 jagi Shambhu arrtsü nungi Delhi-i aotsü meranga liasü saka Haryana nung security sepaitemi parnok nokdanga liasü.

Aluyimertem lenir, Jagjit Singh Dallewal-i lumia longkak

ait tenzükba sülen Brihostibarnü anogo 52 jungogo. Pa pusema aluyimer 111-ia Khanauri anasa Haryana arrtsülen lumia longkak ait tenzükogo. Punjab aser Haryana na tsüngda Shambhu border point nung osangbenertem den jembidang Kisan Mazdoor Morcha lenir, Sarwan Singh Pandher-i, tesüiba ita 11 tashi Shambhu aser Khanauri arrtsülen aluyimertemi longkak aita arudar, ajisüaka Centre sorkari aluyimertemi akhangba magizüker, ta metetdaksü. "Tanü telok anapronglai (SKM-Non Political, KMM) aluyimer 101-i January 21 nü Shambhu arrtsü nungi Delhi-i

apusotsü telemtetba agiogo," ta Pandher-i metetdaksü. "Ken o jembitsü atema sorkari memelunger ama onoki bilemer. Longkak tesashiba aittsü atema telok anapronglai (SKM-Non Political, KMM) telemtetba agiogo," ta Pandher-i ashi.

January 15 nü aluyimer 111-ia sorkar nem takhangba agüja aser aluyimertem lenir Dallewal pusema lumia longkak ait tenzükogo. Sorkari takhangba onüktem magizük tashi parnoki lumia longkak aittsü azüngashiogo. Ano külen Haryana Police-ia arrtsülen security akangshiogo aser Section 163 benokogo.



January 16, 2025 nü New Delhi nung Delhi AICC in-charge Qazi Nizamuddin, Delhi Congress Tir Devender Yadav aser Telangana Chief Minister A. Revanth Reddy nungeri osangbenertem den jembiba sülen tangokba noksa nung angur. Brihostibarnü Congress-i Delhi election nung takok ngura parnoki LPG cylinder sen 500 agi agütsütsü, angati ration aser electricity unit 300 tashi angati agütsütsü, ta nangzükogo.

Israel-Hamas tsüngda rara anentsü lemtetba India-i pelaa agizüker

New Delhi, Aenjeti/January 16 (Agencies): Israel aser Hamas na tsüngda rara anentsü apua alirtem chiochtsü atema telok anapronglai telemtetba agibaji India-i pelaa agizüker, ta Brihostibarnü India-i metetdaksü.

2023 küm October ita nungi tenzükba tesüiba ita 15 tashi Gaza nung Israel aser Hamas na tsüngda raraa aruba sülen rara anentsü aser pua alirtem chiochtsü telemtetba agiogo.

Ministry of External Affairs (MEA)-i sangdong ka ajanga, rara anentsü telemtetba agiba ajanga Gaza nung timtemertem nem teyari balala agütsütsü atema lenmang sadema lapoktsü imlar, ta metetdaksü.

MEA sangdong ajanga, "Gaza nung rara anentsü aser pua alirtem chiochtsü atema tezüngzüktep agibaji onoki pelaa agizüker. Iba ya ajanga Gaza nung timtemertem nem teyari balala agütsütsü atema lenmang sademsadema lapoktsü onoki imlar. Pua alirtem chiochtsü, rara anentsü aser ken o jembiba ajanga mangatettep bentettsü atema onoki aiben tayongzükba agüja aruogo," ta metetdaksü.

Bodhbarnü US Tir Joe Biden-i, Israel aser Hamas nati rara anentsü aser pua alirtem chiochtsü asoshi tezüngzüktep agiogo, ta sangdonga liasü.

"United States den külemi

Egypt aser Qatar linüktemi ita aika ketdangsertem den jembiba aruba sülen tanü (Bodhbar) Israel aser Hamas nati rara anentsü aser pua alirtem chiochtsü atema telemtetba agiogo," ta Biden-i sangdonga liasü.

Joe Biden January 20 nü Tir menden nungi anentsü lia Israel aser Hamas na tsüngda iba tezüngzüktep agitetba ya pa asoshi takok tuluka ama züngshir.

Arrshi küm 82, Biden-i, "Iba tezüngzüktep ajanga Gaza nung rara anentsü, Palestine nungertem nem teyari agütsüba lenmang lapoktsü aser pua alirtem ita 15 tashi timtemba sülen tesüsa parnok kibongtem den tanaben longjemtsü," ta metetdaksü.

Ano külen US Tir menden atema shima alisang, Donald Trump-i, "Rara anentsü tezüngzüktep agitetba ya yaküm November ita nung onoki takok anguba ajanga lir. Iba takok ajanga alima dang ni aniba administration-i yimjung atema inyaksü aser America nunger ajak aser onok pusemertem kümzüksü atema tezüngzüktep agitettsü ta sayur. Pua aliba America nunger aser Israel nunger tanaben pei kidangi oa kibong züngsemtem den tanaben longjemtsü, ta meteta ni pelar," ta metetdaksü.



January 16, 2025 nü New Delhi nung Jangpura constituency nungi AAP candidate, Manish Sisodia-i Delhi assembly election nung tokteptsü atema nomination file asüadang tangokba noksa nung angur.

BJP-i candidates tenüng sangdong

New Delhi, January 16 (Agencies): Taruba Delhi assembly election atema BJP-i mezüngbuba list ana nung candidate 58 tenüng sangdonga liasü; mezüngbuba list nungji Kalkaji nungi taoba mapang MP, Ramesh Bidhuri densema liasü.

Ramesh-i Aam Aadmi Party candidate aser Delhi Chief Minister Atishi den tokteptsü. Ano New Delhi menden nung AAP tongti lenir, Arvind Kejriwal-i BJP candidate, Parvesh Verma den tokteptsü.

BJP indang tanabuba list nung taoba mapang AAP lenir aser tang BJP nung dena alisang Kapil Mishra densema lir. Mishra-i Karawal Nagar menden nungi tokteptsü.

BJP list tasembuba nungbo candidate ka dang liasü.

BJP indang tatembangbuba list aser list pezübuba nung dena alirtem rongnung BJP national office-bearers- Dushyant

Kumar Gautam aser Ashish Sood na densema lir. Gautam-i Karol Bagh menden nungi aser Sood-i Janakpuri menden nungi tokteptsü.

Arvinder Singh Lovely-i Gandhi Nagar menden nungi, taoba mapang AAP lenir Kailash Gahlot-i Bijwasan menden nungi aser taoba mapang Delhi BJP Tir, Satish Upadhyay-i Malviya Nagar menden nungi tokteptsü.

BJP candidates sangdongba sülen osangbener den jembidang Bidhuri-i, "Kalkaji assembly menden alanzüksü atema party-i maneni kü dak melung lemtetba atema pelar. Arvind Kejriwal ajanga Delhi timtemer. Kalkaji nunga Chief Minister Atishi yimsüsüba kübo nüburttem timtemer," ta ashi.

Assembly menden 70 aliba Delhi nung February 5, 2025 nü election agitsü aser February 8 nü votes azüngtsü.



TIR YIMYIM

YIMOBILEM (EDITORIAL)

DIMAPUR ROGONÜ, JANUARY (AENJETI) 17, 2025

Linük tir dena apuba ya koda ?

Asenok asoshi tamamangtsüka asütsüa akok, saka tang mapang tatsüka tsüngda alima nung yimten yimsüsürtem ajak asoshi tansütsüsa atalokba mapatem rongnung pei nübortem ain adokba tsüngdang Bangladesh ato kilonser Sheikh Hasina pei kidanga jenoka melitet pei lima nungi ajentsüsa akümba aser ano Syria nunga tir Bashar al-Assad pei lima toktsür Russia nung oa jenoktsüsa akümba den ano tang South Korea nung tir Yoon Suk Yeol par government-i pa tir menden nungi anentsür külenang, par sepaitem nem pa pudaktsüba tatalokbatem ya asütsü. Item ajakji nübortem dang meima anepalutsüba ser nung nübortem dang memeim ser pei agitsü dang bendentsü bilemba aser nübortem nungdak mereprangtet aser nübortemi ayimtenba mangashi ser nübortem tajemrep tia nung toktsüba ajanga atalokba timtem lendongtem lir. Aji oda, Hasina aser Assad na pei lima nungi jena orr tangar lima nung jenoka aliba tatalokba otsütem ya khen toktsür, South Korea nung tang tatalokdak yimten tensa indang ya bilemdangra, par linük nung tir Yoon menden nungi anentsür külenang ano par sepaitemi pa tir kidang nungi puzüka bener oagi pai linük nübortem akoksatsüsa inyakba mapatem indang ken o asüngdang tenzükba ya, alima nung yimsüsürtem kümdangtsüba tatalokba ka asütsü. South Korea nung 2022 küm Yoon ya tir kümli nungi pai inyakba mapatem agi nübortem jashidaktsü aser talisa pa dang masü saka pa kinungtsü Kim Keon-hee-i dena ochimashi mapa inyakba ken o bushisüngdangtsü pai nokdangba agi külem yimten yimsüsürtemi dena pa dak mulung machi tenzük. Iba amaji tatar senden nung opposition-i dang masü saka government nung alirtemi dena pa mapa anemba nungi jenbuttsü asoshi pai tatar senden anendaktsür tir tashi amshia yimsüsütsü tebilemba nung taoba ita December 3 nü "martial law" agütsü, ajisüaka iba ozüngji nübortemi dang masü saka tatartemi dena magizük, anungji tatartem adenshia pa tir menden nungi anentsütsü asoshi tatar senden nung ken o benoka jembitsü tenzükba sülen tang pa par government-i tir menden nungi anentsüba dang masü saka pa anema pai ochimashi aser meshitak inyakba ken o aser mapatem bushisüngdangtsü asoshi par police-temia pa anema ken o agütsüogo aser joko tangbo pa pur pa dang ken o asüngdang tenzük. Atangji, tamasabo tatartemia pa tir meden nungi manendaktsütet aser police-temia pa meputet, kechiyong pa alidak tir kidang pa jenoka yur par ki meketa pa pu asemer nübortem adenshia pa apui arur sepaitem par ki kilongi aitsü memela aser par anüker sepaitemia pa apui arurtem nokdang. Iba amaji anogo ishika pa par kidang jenoa lidaktsür yakanü par police 3000 tashi agi tir kiji nungpoka tur pa pur ken o asüngdang tenzükogo. Atangji, Yoon-ibo tang tashi pai linük anema tai kecha meinyak aser pa tir menden nungi anentsür pa apuba mapatemjiang linük ozüngi memelaba inyaker ta aija nokdaka lir. Ajisüaka, pai pa tai dang masü saka pa kinungtsü ochimashi mapatem nembangtsü aser tena anema linük ozüng amshitsüsa mapang madoktsü atema North Korea den rara menatsü asoshi inyakba mapatema pa anema ken o bushisüngdangertemi puteta lir. Atangji, ochimashi yimsüsürtemi pei tai mebushidaktsütsü atema nübortem rongnung tanga ken o jembitsüsa tensa tasen ka yanglur aser parnok tai nembangtsü asoshi tangar kin den rara menar. Aji oda, tangar tsükchir kin den rara ayongzüka yur, shibaibo pei yimten yimsüsür anema ken o benoktsü ? Iba ama rara nung nübortembo aika asütsü aser yimsüsürtemi pei linük aser nübortem anema inyakba taitem bushitsübo amadoktsü. Tanü alima tesem balala nung tematiba yimten menden nung amenertem pei menden nungi alubaji dang masü saka pei lima nung pei kidanga melitetsüsa akümbaji , yimten tashi amma yur nübortem asoshi masü saka pei asoshi dang inyakba ajanga nübortem ain adokba mapa ka lir. Idakji tan ser yimsüsürtema nübortem den angatettetpa yimsü asütsüla aser nübortema yimsüsürtem dang o shitetsüsa pei mapa nung ochishia alitsüla aser mapa tulu-tila ta masü nendaka inyaktsüla.

OLEMSABANG

INYAKSANGSHI TENÜNG SHIDAK JEMBIYIM

- T. Meren Paul, Kohima

(Yashi adok nungi...)

24. Tzüasen - Manü ametdang, shiküp takong asodang tzü aiben rosebdakja asoba, Tzüsen aaso ta ajar
25. Ongsah - Süngjang lijang ano junga mamen tajitsü majung tazü asüdang akizükba, Ongsah ta ajar
26. Ongzük - Süngjang lijang tamen tajitsü shidak nung agizükba- Aong, Ongzük ta ajar.
27. Zübi alep - Au tera lanu tazüng nungi mokozüka aluba mapang tachitsü lepzükba
28. Züatsü - Au süngkum kuma juteta atuba lanu alidang tachitsü lepzükba dang zü atsü ta ajar.
29. Zü aset - Etsük ayutsü asoshi Züset semki nung alih agi zü ajensaba dang zü asset ta ajar
30. Yong aya - Yong mejitsü atema au züno lepzüka temeyong jemtsüba tettet ayasaa kohzükba
31. Shiasen - Nashi, Ak shiruru temang rangben lepsaa awazüba dang Shi asen ta ajar.
32. Pobangmet - Jenjang tzü nung metener Amji nung aleper alibo tebang tema nung long agi neniter mimung nung mi apua tzü tatsük tangola agi sahka metahba dang Pobangmet ta ajar, steaming.
33. Alu aruh - Alu tamen tsükjong linok agi rangzükba, Aluru, alu aruh
34. Aluzü - Alu apah rongdoker süngkang longkang aser rongpet rongra bendena rongkdokba, Aluzü
35. Rongaji - Alu ludi küm kümbok, leptsü, waja aser atsüng lanu meyi aliba lepdokba, Rongji
36. Mo azü - Tsükjung rohzüker nangdena doktsüba Obenji nung bendena aoba dang Moazü ta ajar.
37. Monang anet - Tsük ruhzüker bakti nung doktener tetsüng agi ajemshia tsükjang monokzükba dang Monang anet ta ajar
38. Tsüksü ap - Ji nung tsük azüki ajunketer dokzüka yokdang per agi mopung apshia tsüksü apdokba
39. Tsüksen - Semkilung nung tsük dokoker alih agi ajemshia teküp sakzüka endokba, Tsüksen
40. Jangsang atong - Jang septeter tsük mesenra aliba tanaben semki nung senshiba, Jangsang atong ta ajar
41. Anko asü - An entsü akotsü pa sahsa menden mesemtetba dang Anko asü ta ajar
42. Tesep aden - Ozüsangno, Ninang tesep yangluba dang tesep aden ta ajar
43. Tesep asü - Shiruru tejanu meputsü asoshi arem nung süngsem nguzüker tesep yangluba.
44. Zütsükaon - Tzü nung ango aputsü zütsük mesaer yokba
45. Sangaso - Shiruru aputsü süngzü mekia yanglur pa senzüdak mesanga ayuba dang sangaso ta ajar
46. Menak - Temeli sakzüka alur tangshia chidangba
47. Moak - Tebangmechi aser temeli agi mesepshiba
48. Milongji along - Süng temerang milongsang mijang mesepdaksüi aut agi rembanga ayuba
49. Milongsang - Memong nung mi jangruloka arongba süng dang milongsang ta ajar
50. Mokozü along - Melak tulu madokdaksüi mi apua mokozü aika adokdaksüba

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Osangtajung proksang Arthur Blessitt süogo



January 16, 2025: Continent tenetprongla sema Khrista osangtajung proksang, US nunger sayutsüngir Arthur Blessitt alima nungi pilaogo; pa arrshi küm 84 liasü.

Arthur Blessitt-i linük 324 sema senzüogo aser Khrista osangtajung proksü atema mile 43,000 tetsüng agi jaja liasü. Pai pa aolen ajak süklep 12 talang Kangki ka apua liasü.

Pa indang website ajanga, January 14 nü Arthur alima nung wadang tembangba sülen kotaki ogo, ta metetdaksü. Arthur Blessitt arrshi küm 7 asüdangyongi pai Tsüngrem ajuru aser arrshi küm 15 asüdang sayutsüngir aküm. Arrshi küm 20 asüdang pa 'ordain' asü aser pai lenmang nung sayutsüngia jajatsü atema pa taküm bendanga agütsü.

Küm 56 tashi Tsüngrem

tenzükba wadang nung jajadang pai süng agi yangluba Kangki apur jajaba meraji million 86 liasü.

Temeshi ainlen talangtiba jajaba atema pai 'Guinness World Record for the Longest Walk/Pilgrimage' angu.

Arthur Blessitt-i, "Ni ya Kangki aser Yisu ajungkettsüba katu ka aser temeshi ainlen jajar ka dang," ta jembia liasü.

Pa asütsü jakdang pai jelia, "Kü Kibuba aser kü Kümtetdakba den akumli jangratema jajaogo. Sentsüwangshi lenmang nung jajatsü ni yongyaa liasü. Lenmang menen-a alidak jajaba tetsüng ya joko hon agi menokbanga aliba lenmang nung jajatsü. Yisu ano ajurutsü renema lir. Ni tang pilaa aotsü mapang nung ni Yisu den pelateper. 'Oba, Nü tekabu nung ni kü tanela bendanga agütsür'. Tatamsa

ni kidang lir, aser iba ya ni ainlen jajaba tatembangbuba. Ni sayutsüngir ka liasü, tanelatem kümzüker sayutsüngir ka, temeshi ainlen jajar ka aser Kangki apur Khrista atema kulisür ka liasü," ta metetdakja liasü.

Pai pa nüngtem nung memorial sentong magitsü saka ajak den Khrista osangtajung dang lemsateptsü mepishia liasü.

Arthur Blessitt ajanga nisung aika ajungmesoogo aser parnok rongnung lenmang nung sayutsüngir Lyndsay Hamon densema lir.

1972 küm Westminster Central Hall nung Blessitt-i sayutsüngiba mapang nung Lyndsay Hamon taküm nung jembia liasü.

Osangbener den jembidang Hamon-i, "Pa tejak nung Kibuba dak anguba tepela liasü. Pai jembiba ajanga menenpurtem Kibuba dangi ani," ta ashi.

Sayutsüngir, Lindsay Hamon-ia süklep 12 Kangki ka bener Europe aser Asia tesem ajaklen sayutsüngia jajar. Pai-a aika Khrista dangi aniogo.

Arthur Blessitt-i ashiba agi, pai küm 56 tashi alima nung tesem balala sema senzüdang anogo ka kija nung talangtiba jajabaji mile 72 (kilometer 115) liasü.

Arthur Blessitt-i pa kinüngtsü, Denise den chirnur tenet, semchir 12 aser tanaben semchir ka toktsür pilaogo. Pa kinüngtsüa ordained minister ka lir.


ANOGO ABEN TSÜNGREM DEN

PA DANG TASHI ANGABA NUNG TEPLATSÜ

"Anogoshia Kü süngkhüm nung mita, Kü kishizüngdang ata, Kü dang angaba nisungji tepelatsü. ~ Apijemtsü 8:34"

Tashi angaba ya tapu aika lir ta ashits? akok, karbo tim masüba maparen nung tashi angaba ajanga tamajung ajangzükba lir. Rom6:16 nung ashir, Shiba dang nai tash angar, iba larji na lir. Nai ochi mashi mes?ra rongsen penbuba lar kümra tamajung nung nai tashi angar, anungi iba kübok na alir asünung temenen mojing dang nai tash angar ta metetang. Saka na aser ni Tsüngrem akümtsübun mapang ajak nung Pa den saksalema Pai mulungba lenmang nung jajara koda tepelatsü. "Ibri 5:8 nung ashir, Yisu Khristaia Pa timtem toudhi anguba nungi tashi angatsü angazük. Tsüngremi mulungha lenmang nung jaja-a Pa dang tashi angatsüba ya lenmang temesü saka iba nung jajetet nung dang tanela tongpang akoker. Tsüngrem dang tashi angaba jagi dang asen taküm kibong aser linük nung temoatsü alir ta Isaia1:19 nung shia lir. "Tsüngremi temoatsütem asenok nem agütsünür aser tepela mulungjang agi kuli tajung bener lidaktsünür. Saka aj ajangzüktsü asoshi asenoki Pa dang tashi anga-a, timten arema tamajung mapatem nem mokokdaksüi Pa dak azüita mapang ajak nung tamanger tajung ka ama merüka meshia jajatsü tangatetba nung alitsü merangdi.

Billy Graham Evangelistic Asso.-i continent 5 nung osangtajung lemsateptsü



January 16, 2025: 2025 küm Billy Graham Evangelistic Association (BGEA)-i continent pongu nung Khrista osangtajung lemsateptsü; taküm BGEA-i tang agi pezübenbuba UK semdanga London nung 'God Loves You Tour' agitsü.

BGEA-i, alima nung nisung aikati taküm nung tasüngdangba balala atema telangzüba bushir, ajisüaka aikati tejenokdak mangur, ta metetdaksü.

Kar temesepba chiyungtsü balala agi timtemer, kar kibong nung timtem, kar azüngmeyak agi timtemer aser kar terata nung alir; parnoki teimla aser tesünep aginer aser taküm nung temelenshi nüngdaker, ta BGEA-i metetdaksü.

Billy Graham Evangelistic Association (BGEA)-i, chichiba teimla aser tepelaji Yisu Khrista den tesendaktep ayuba ajanga angur, ajisüaka nisung billion aikati tang tashi Khrista osangtajung mangashi, ta metetdaksü.

Ajioda BGEA-i 2025 küm North America, South America, Europe, Africa aser Asia nung aliba local Arogo meyrjang aika den longjemer evangelistic sentongtem ayongzükba Yisu Khrista osangtajung lemsateptsü.

Nüngtugu sayutsüngir, asür Billy Graham'er semchir aser BGEA vice president Will Graham-i, "Ni kanga pelar, kechiyong Tsüngremi Pa

tenzüktsü atema onok nem ano küm tasen ka moatsüogo," ta metetdaksü.

Evangelistic sentongtem nung Will Graham aser tebu Franklin Graham nati Khrista den taküm tasen alitsü atema lemsateptsü.

Khrista sülen anidaktsü atema telemtetba agirtemji local Arogotem den sendakteptsütsü, aser ibaji ajanga parnok tamang jenjang maneni aintsü.

Africa - Addis Ababa, Ethiopia nung March 8-9 anogotem nung Franklin Graham leniba nung God Loves You sentong agitsü. Ethiopia nung tesüiba mapang reshikangshi liaka tangbo Arogo nung asentenshi milak jangrudar. God Loves You sentong atema Christian Life and Witness courses jelia agiogo aser nisung 26,500-i iba course agia liasü. Ethiopia nungsa pastor tem atema "Proclaim the Truth" conference agitsü.

North America - Fountain Hills, Arizona, USA nung March 22 nü Will Graham leniba nung 'Look Up Celebration' sentong agitsü. Will Graham-i, "Fountain Hills aser greater Phoenix area

nung alir ajak dang Yisui parnok meimer aser parnok taküm atema Tsüngrem sentong tajung lir ta metetdaksünür," ta ashi.

South America - Cochabamba, Bolivia nung April 5 nü Will Graham leniba nung "Light of Hope" sentong agitsü aser iba atemaji Arogo 700-i renemdar.

Iba sentong nung adenertem aika asütsü ta asadangtetba sülen sentong ayongzükertemi stadium tuluba ka mekazükogo.

Europe - Berlin, Germany nung May 27-30 anogotem nung Europe tesem ajaklen nungi Arogo lenirtem meyrjang aika Germany yimtiba, Berlin nung adenshitsu aser European evangelism conference nung adentsü. Iba senden nungji lenirtem dang Khrista atema tasü itta kulisütsü atema ajungshitsu.

2000 küm Amsterdam nung conference tuluka agiba sülenbo tang Europe nung ayongzükba aliba ya Khristan lenirtem atema conference tulutiba asütsü.

Europe - London, England nung June 21 nü Franklin Graham-i tang agi pezübenbuba God Loves You Tour agitsü. Iba

sentong nungji osangtajung kenteneritem- CeCe Winans, Michael W. Smith aser The Afters-i ken atentsü. Iba sentong tembangba sülen pastor tem atema "Proclaim the Truth" conference agitsü.

Europe - Brussels, Belgium nung September 27 nü Franklin Graham-i Brussels nung Khrista osangtajung lemsateptsü. Iba ya küm 50 tsüngda tang mezing Belgium nung Arogotemi longjemer ayongzükba sentong tulutiba asütsü.

Europe - Tallinn, Estonia nung October 18-19 anogotem nung Will Graham leniba nung 'Time of Hope Celebration' sentong agitsü. 1980s nunga Estonia linüki Billy Graham aser Franklin Graham jaoka liasü.

South America - Buenos Aires, Argentina nung November 7-8 anogotem nung Franklin Graham leniba nung evangelistic sentong ka agitsü aser "Proclaim the Truth" pastors' conference-a agitsü.

BGEA-i Khristantem dang item sentong takok ngua agitettsü atema sarasademjang, ta mepishia metetdaksüogo.

AO OSHI ANGAZÜKDAK:

TANÜ ANGAZÜKTSÜBA OJANG



Tebangkatsü

(adj) tamamangtsü, tesüngmangtsü, meimlaba mapa tulu atalokba (unbelievable, incredible)

* Tanü asüng computer ajanga inyakba mapatem ya tebangkatsü ka lir.

Tebangmechi

(n) tebangküp (lips)

Tetsürtemi tebangmechi nung temerem ateper.

OLONG PAITEP # 7037

	1		2			3		4		5
6								7		
					8		9			
			10							
11										
				12						
13		14		15						16
17										18

TIPLIN

- 1. Inyaker ajangtelba - (3)
- 3. Bangsemo adokdak - (5)
- 6. Shitak mesüi inyak - (7)
- 7. Ya mimong nung angur - (3)
- 9. Repranzük - (4)
- 10. Tasola - (5)
- 11. S _ _ _ _ - (4)
- 13. Yagi ajak ashioktsür - (3)
- 15. Ki aokba oset - (7)
- 17. Ak shi nung inokba tasen - (5)
- 18. Ishika - (3)

LANGTSÜNGLEN

- 1. Meshidak - (3)
- 2. Tanaben soshir - (7)
- 3. Iba anogo - (4)
- 4. Meshi - (3)
- 5. Yagi mi tsükloker - (9)
- 6. Shi tapu ka - (9)
- 8. Yagi ayimer saka ozü masü - (3)
- 9. Ajokba shiruru ka - (7)
- 12. Inyaktet - (4)
- 14. _ _ _ hi - (3)
- 16. Akümüli nungi pilar - (3)

OLONG PAITEP # 7036 TELANGZÜBA

TIPLIN :

- 1. Telok, 4. Aluru, 6. Ozüng,
- 8. Emk, 9. Kin, 10. Teti, 12. Süir,
- 13. Jen, 14. Ola, 16. Talak,
- 17. Mazük.

LANGTSÜNGLEN :

- 1. Tenükjang, 2. Luden, 3. Kiooktsü,
- 5. Lenti, 7. Tajangzük, 11. teronem,
- 12. Sempa, 13. Jahaz.

NAI-A YA METETTER MA



5buba BBC Indian Sportswoman of the Year atema asyarterm tenüng sangdongogo. Taküm iba naroküm atema golfer Aditi Ashok, shooters Manu Bhaker and Avani Lekhara, cricketer Smriti Mandhana aser wrestler Vinesh Phogat nunger nominate süogo. Indian Sportswoman of the Year atema BBC indang Indian Language websites, mesüra BBC Sport website nungi vote sütettsü. Vote ya January 31, 2025 nü tashi agütsütettsü aser takoker ya February 17 nü Delhi nung sentong ka agiba mapang sangdongtsü.

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

Manipur nung ali acres 8.8 nung poppy tsünüa aliba raksatsü



Imphal, Aenjeti/January 16 (Agencies): Poppy arutsü anasa lia Manipur Police, Assam Rifles, aser Forest Department senteper Churachandpur district nung Sangaikot-Police Station kübok Haopi Mollen hill range nung ozüng alema poppy ali acre 4.8 nung tsünüa aliba raksatsüogo. Myanmar den arrtsü nung Manipur kübok Churachandpur district nung Bodhbarnü iba

meita oaba sentong benoka inyak aser poppy ya Executive Magistrate ka matsüngdang raksa intokja liasü. Poppy tsünüba anendaktsütsü atema inyakba mapang hopta ka majung tsüngda iba tenem nung aliba tesem nung poppy ali acre 8.8 nung tsünüa aliba raksatsüogo, ta ketdangsurtemi metetdaksü. Iba dak sendakba nung ken o ka benokogo aser poppy

tsünürtem ya jangja-a aputsü atema jenjang agidar. January 8 nü joint team kati kasa tesem nung poppy lu yima aliba raksaja aoba sentong ka ayongzüka agi aser iba mapang ali acre 4 nung poppy tsünüa aliba raksaja liasü. Meita aoba mapang poppy pods 10 nguteta liasü. Iba dak sendakba nung ken o ka benokogo aser aibelena alirtem aputsü merangdar.

Mizoram nung prangbong injang shibelener 5 apu

Aizawl, Aenjeti/January 16 (Agencies): Myanmar kübok Chin state nung amendaker aliba telungpur telok Chin National Front (CNF) nungi tongtibang lenir ka densema nisung pongu puogo. Parnok ya Bodhbarnü Bangladesh arrtsü anasa Mizoram kübok Mamit district nung prangbong aser injang shiblenba atema puogo, ta Mizoram police-i sangdong ka ajanga metetdaksü. West Phaileng police station kübok Saithah yimtsüng tezülen state police aser itangiter

agency ka senteper meita aoba mapang aija alir parnok pongu ket nungi AK-47 assualt rifles trok, injang 10,050 aser magazine 13 nguteta liasü, ta kasa sangdong ajangsa metetdaksü. Item prangbong injangtem apuba ya state nung prangbong injang timtiba apuba ka lir aser state temeket nung yimjung aser tesunep amokmerena aliba aziökogo, ta parnokisa ashi. Ken o bushisüngdangba sülen item prangbong injangtem ya CNF aser Bangladesh kübok Chittagong Hill Tracts (CHT)

nung amendaker aliba telungpur telok United People's Democratic Front (UPDFP) na melentepü liasü, ta ngutetogo. CNF lenir tongtibang ka apuba ya Mizoram nung counter-insurgency operations nung takok tulu ka lir, ta police-isa metetdaksü. Mamit district kübok West Phaileng police station nung ken o ka benokogo aser prangbong injang shiblenba tezü raksatsütsü atema bushisüngdang maneni südar, ta kasa sangdong ajanga metetdaksü.

Imphal nung ki ka nung grenade ka nguteta liasü

Imphal, Aenjeti/January 16 (Agencies): Manipur kübok Imphal West nung nisung ka kidang Brehostibar anepdang grenade ka nguteta liasü. 36 HE grenade ya Imphal West district nung Singjamei police station kübok Kakwa nung arishi küm 64 tain Asem Ranjit'er kidang nguteta liasü. Iba nisungba ya state Agriculture Department nung field assistant ka liasü aser pa Kakwa Huidrom Leikai nung alir. Grenade anguba sülen Ranjit-i Singjamei police station



nem osang agütsü aser bomb detection aser disposal squad nungi team ka iba tesemi oa liasü. Ghonda ka merangdangba

sülen iba team yagi bomb ya takok ngua defuse süja liasü. Bomb ya kechiba Ranjit'er kima toktsü, aji jangjatsü atema bushisüngdangdar, ta police-i ashi. Tang tashi nung kija mesüra telok kichaiya bomb toktsüba indang nangzüka mali. Kasa mapang nung Meira Paibis-i nisung aliba tesem nung iba bomb toktsüba ya aitsüogo. Parnoki bomb toktsürtem dang tarutsü nungbo nisung aika aliba tesem nung bomb tokja nüburtem amokmeren masütsü mepeshia metetdaksüogo.



Aizawl: Taoba army tekolakba General Vijay Kumar Singh, Brehostibarnü Mizoram Angh ama tenangzüktepba agiogo. 1987 küm Mizoram state anguba sülen pa ya Angh 25buba lir. Singh-i Hari Babu Kambhampati melenogo, shiba Odisha Angh kümogo.

Israel-i maneni Gaza amaker, nisung aika tepset



Gaza City, Aenjeti/January 16 (Agencies): Hamas den ceasefire tezüngzüktep ka agia Deobarnü nungi tenzuka pua alirtem chiyoktsü mapang tatonger lia Israel-i tayimtsü amshia Gaza nung maneni amaker, aser iba ceasefire tezüngzüktep ya Israel cabinet ajanga melaba dak keta lir.

Iba tezüngzüktep sangdonger yasung amakdang nisung 73 tepset, ta Gaza nung Hamas meyong civil defence agency ajanga ashi.

Asürtem rongnung nisung 12 bo Gaza City kübok Sheikh Radwan kiyong nung residential block ka nung alir liasü, ta health ministry ajanga ashi.

Israeli Defence Forces-i mezüngbo Bresthostibarnü Israel south tsütsü "fallen projectile" ka jangjatetogo ta ashi, saka mapang tatsüka lir tai jangjatetba lir ta shia liasü.

Taoba mapanga ceasefire tezüngzüktep mapa kuma amshitsü lia tayimtsü amshia maka liasü, aser tang tesüsa Lebanon nunga November ita ceasefire alitsü ghonda ishika lia Beirut nung bomb tesashi poklokja liasü.

Israel Ato Kilonser Benjamin Netanyahu-i Gaza ceasefire agreement ya Bresthostibarnü parliament nung tejangja metetdaksütsü liasü, saka Hamas-i agreement shilem kar raksaba ajanga tatema mepetmesü adok, ta pa indang office-i ashi.

Hamas-i iba agreement nung aliba ajak magizük tashi cabinet mejateptsü, ta parnokisa

ashi. Hamas ketdangsür katibo, par telok ya tetsüngtai ia jembir temi sangdongba agreement nung rangloka lir aser par delegation tekolak Khalil al-Hayya-ia Qatar aser Egypt dang agreement indang terms ajak agizükter ta metetdaksüogo, ta ashi.

Hardline right-wing minister ana - Finance Minister Bezalel Smotrich aser National Security Minister Itamar Ben Gvir nati mapang talangka nungi ceasefire lira coalition sorkar nungi anentsü ta amokmerena arur.

Yamaji inyakra Israel nung election tasen agitsüsa akumtsü, saka Netanyahu-i aginüra parnok anenba ajanga tezüngzüktep menokdangtsü ta ashir.

Tetsüngtai ia yimjung ken o jembitsür Qatar indang ato kilonser-i telok anatsü dang hopta trok noklem mezüngbuba ceasefire deal tenzüktsü lia süngjema alitsü ayongzuka liasü.

Iba mapang tetsür, tanur aser teintet rogodem densema pua alir nisung 33 chioktsü aser iba melen Israel nung Palestine nung yua aliba chioktsü.

Israel sepaitem ya Gaza nung nübur kanga longsoa alidak tesemtem nungi pilaa anüdokleni aotsü.

Iba rara mechi pei ki yutsür tesem balala nung jenshia alirtem tanaben pei kidangi arutsü melatsü aser teyari oset bena aliba lorry (gari tulu)

noklang aika anogoshi aitdaksütsü.

Noklem tanabuba ceasefire asoshi jembishinü ya anogo 16 buba nung tenzüktsü aser iba kübok tanüngba pua alir ajak chioktsüla, Israel sepaitem ajanga ainshitsü aser "sustainable clam" meyipa arutsüla.

Tasem buba aser tatembangba noklem nung tanüngba pua alir tasümgang lira meyipa agütsütsü aser Gaza yanglushitsü, aser iba mapa ya küm aika agia inyaktüsü.

Iba rara ajanga kanga sashia raksatsür alinungji, Gaza yanglushitsü ya tayongzükba tulu alitsü, ta United Nations Development Programme nungi Achim Steiner-i ashi.

Gaza nung pei ki alidaki meyipa marudang "toxic rubble" 40 million tons shi indoktsüla, ta pai ashi.

"Iba mapa ya kangasa tepenja aser aji asenoki ajurutsü," ta ashi.

Hamas-i October 7, 2023 nü arütsü alema aita Israel amakdang nisung 1,200 shi tepseter ano nisung 251 pua bener aoba nung telangzuba agüja Israel-i Hamas samatsütsü campaign tenzük.

Israel, US aser dangar temi Hamas ya kiralongrar telok ka lir ta sangdonga lir.

Iba sülen Gaza nung nisung 46,788 dak tema tepsetogo, ta Gaza nung Hamas meyong health ministry ajanga ashi.

Iba territory nung nisung 2.3 million liasü, saka tangbo timba pei talidak ki yutsür tesem balala jung jenshia lir, aser tesem ajaklen ki o jen raksatsüogo aser chiyongtsü, totzi, mozü aser jenokdak tesem agi kanga anünger aser aid agencies temia nüngdabapur nem teyari magütsüteter.

October 7, 2023 nü pua bener aor nisung 94 tang tashi Hamas-i yua lir ta Israel-i ashir aser item rongnung nisung 34 süogo ta amanger.

Item den ano rara metenzükdang Israel nung nisung pezü pua bener orr liasü, aser yangjia anabo süogo.



**OFFICE OF THE
KÜPZA SENSO MUNGDANG
KÜPZA : MOKOKCHUNG – 798601 : NAGALAND**



TENÜNGSANG AGÜTSÜR

Küpza Senso Mungdang-i Wb.M.Limameren Ao aser Wt.P.Merennungla na jala **Dr. SUPONGBENLA LONGKÜMER-i** Tata Institute of Social Sciences, Mumbai nungi Thesis "The Politics of Memory and Processes of Remembrance: An Understanding from Women in the Naga Movement" nung Doctor of Philosophy renemba atema tetushi aser tenüngsang agütsür.

Tsüngremi maneni la taküm wadang nung Kupa Senso aser nüburtem asoshi moajangma.

<p>Sd- TINUMAYANG President Küpza Senso Mungdang</p>	<p>Sd- BENDANGNUKSHI Convenor Limameren Award Trust</p>
---	--



**OFFICE OF THE
MERANGKONG SENSO EMPLOYEES' UNION
REGD. NO. H/RS 191 DT. 11.03.99
MERANGKONG P.O. TULI 798618 DIST. MOKOKCHUNG NAGALAND**

TENÜNGSANG AGÜTSÜR

Wb. Lt. Olemtuba Jamir aser Wt. Narotosula tena jabaso **SHRI. O. IMLIWATI,** Directorate of Treasuries & Accounts nung Director menden tongtetba atema Merangkong Senso Employees' Union-i anir nubor ajaki tenüngsang agütsür.

Maneni asen Teyanglur Tsüngremi ner kibong aser wadang nung len aniangma.

<p>Sd/- Er. Lanukaba. B President</p>	<p>Sd/ Wapangtemjen General Secretary</p>
--	--

Joe Biden-i tatembang o jembidang taka-taiter dak ranglok



Washington, Aenjeti/January 16 (Agencies): United States tir inyaktüsü shima alisang Donald Trump kümsük tanabuba billionaires agi medembanger tenzüktsü renemshiba mapang Tir Joe Biden-i tir ka ama nüburtem den tatembang jembidang democracy asoshi "oligarchy" aser "extreme wealth" ya lendong lir ta tekumdangtsü ashi.

"Tanü America nung oligar-

chy ajanga rongsen, tashi aser nüburtem atsür arutsü yimya tenzükter aser aijaki asen "democracy, basic rights aser freedoms" ajanga amokmerener," ta Biden-i Bodhbar aonung White House nung aliba Oval Office nungi television ajanga jembi.

January 20 nü Trump inauguration agitsü anogo pongu lia aser Gaza nung ceasefire ka mulungtepogo ta Israel aser Hamas nati sangdonger ghonda

ishika dang lir Biden-i iba o ya jembia liasü.

Takar tetsüti ishika kabu nung tashi ajak bendener aser parnoki tim masüba nung tashi amshiba yamaji yutsüra lendong tulu alitsü, ta Biden-i ashi.

Tir inyaktüsü shima alisang Trump indang administration nungya billionaires 11 lir ta Democratic Party ajanga ashir. Item rongnung alima nung takartiba billionaire Elon Musk dena lir, shiba Department of Government Efficiency anitsü ta Trump-i ashir.

US nung yimti tulutiba jenjang tanabuba nung aliba Los Angeles nung morok mi lendong tulu adoka lia Biden-isa pai tzümpung wazüka ayutsü asoshi inyakba maparen nung takok ngua aliba "powerful forces" ajanga samatsütsü ta amokmeren.

Biden-i o jembi tenzükdang

Gaza Strip nung Israel aser Hamas tsüngta ceasefire tezüngzüktep tasen sangdonga aliba indanga athishia liasü, koba Israel Ato Kilonser Benjamin Netanyahu-ibo Trump nem tenüngsang agütsü.

"Ozü administration ajanga tanen makai ita ti jembiba sülen Israel aser Hamas nati ceasefire aser hostage deal ka agizükogo," ta Biden-i ashi.

Biden-isa par teloki iba tezüngzüktep atema jembidang administration tasenba nem osang ajak agütsütsü ashi, kechiaser ibaji timba parnoki mapa kuma inyaktüsü.

Ceasefire ya pa tir inyakba mapang takok ka anguba amai jembiaka 2024 tir election mapang voters aikati Gaza Strip nung raradak Biden-i Israel yariba mechi Democratic Party meyariteter ta shia liasü.

Republican candidate

Donald Trump den mezüngbuba tir election o intepba nung junga shilem magitetba mechi voters aser par party lenirtemi tebilemstü lemsatepba sülen arishi küm 82 tain Biden kümsük tanabuba asoshi toktepba anenadok aser pa indang tatong tir Kamala Harris ang toktep saka tamakok ajuru.

Biden kümsük tatemi anogo ishika anünga lia US East Coast ajanga, Gulf of Mexico anüdoklen aser "Northern Bering Sea in Alaska" shilem kar nung offshore oil and natural gas drilling nokdanga liasü.

Asenok ajak külemi inyakba ajanga temelenshi aruba metettsü mapang agitsü, saka süngjang remogo aser parnok aintsü aser küm aika naro apongtsü, ta Biden-i ashi.

Viswema Youth sports meet tenzükogo



Kohima, Aenjeti/January 16 (TYO): Anogo asem asayatsü aliba 77buba Viswema Youth Organisation (VYO) Sports Meet 2025, January 16 nü John Government Higher Secondary School Ground & Multipurpose Hall, Tewetsoi-Ozwü, Sweba, Viswema yimtsüng nung tenzükogo.

Viswema kübok Kirha, Pavo, Rachü aser Zheri ta kiyong pongu nungi tetsür aser teburtem Football, Volleyball aser Sepaktakraw asaya nung tokteptsü.

Asayamung lapokba sentong nung alakteta jaoker ama shilem agiba mapang Nagaland State Consumer Dispute Redressal Commission züngsem Vitsorel Lcho-i asayartem dang asaya mashi ka nung temaba jenjang tongtetsü atema meranga inyaksü, bendanga agüja asayatsü aser yimyayimpong aziüoka alitsü

ajungshia liasü.

Saisapong ya sen aika aazükba profession ka kümogo aser asaya balala nung asayartem shishilembar mesüra service personnel tem dang nungi sen timba aazüker ta shia pai, sempet akteba lanurtem nem maongka agütsütsü aser sporting infrastructure terenlok atema Centre aser state sorkar napronglai tongtibangsa inyakdar, ta ashi.

Lcho-isa, tarutsü nung temaba jenjang tongteta professional asayar akümtsü atema lanur asayartem dang asaya ajak masayai pei sempet jangja-a asaya ka dak dang rangloker asayatsü ajungshia liasü.

Maneni pai, asayartem dang machimajemtsü achiba nungi pila alitsü aser anema alitsü ajungshiba den asayar ka ama kanga ajema alua tenzüka amateur nungi professional

asayar akümtsü ajungshia liasü.

Paisa, Viswema nungi lanur asayartem temaba jenjang tongteta local jenjang nung dang masü sak national aser international jenjang nunga medal ngua konang tetushi bener arutsütsü imlaba lemsatop.

Asayamung lapokba sentong nung alakteta jaoker ama Lcho-i VYO wako salatsü aser mezüngbuba football asaya tenzükja liasü.

Asayamung lapokba sentong ya VYO vice president Chothavi Mekro lenisüba nung agi aser Associate Pastor CRC Viswema Dzüvingol Sothu-i sarasadema liasü. Sentong nungsa Vimetha Kin-i sobaliba ken ka aten aser Tejonü Lcho-ia ken tajung ka tena liasü. VYO games and sports secretary Puzakhwezo Khanyü-i achaayanga asayartem tenangzüktepba agia liasü.

Kotak India batting coach kümogo

Aenjeti/January 16, 2025 (Agencies): Taoba mapang Saurashtra batter Sitanshu Kotak, Bresthostibarnü India team batting coach asütsü shimogo. England den limited-overs asayamung ka aser taruba ita Champions Trophy asayatsü lia pa shimogo.

Kasa mapang nung Australia den oa asayaba mapang junga masayatetba sülen assistant coach Abhishek Nayar inyakyim asadanga liasü. Arishi küm 52 tain Kotak ya National Cricket Academy nung batting coach ama mapang talangka inyaka aruogo. Pa taoba küm ishika tsüingda senior aser A team tem den asayamung balala nung shilem agiogo.

"Abhishek Nayar-i asayartem nem teyari magütsüteter ta jangjaogo. Kotak ya mapang talangka batting coach inyaka arudar aser asayartem pa dak temulung alemer," ta BCCI ketdangsur tejen kati PTI dang ashi.

Kotak asaya aliba mapang pa ya left-hander ka liasü aser pai first class asaya 130 nung century 15 densema run 8,000 dak tema yanglua liasü.

Pa shimba ya balaka asütsü ta angateter, kechiyong England nung oa India team June ita ang asayatsü lir.

Kasa mapang nung India team kidang England den January 22 nü nungi tenzüka



T20 pongu aser ODI asem asayatsü.

"India A shadow tour ka lir aser yimya agi Kotak-i A team achaayanger. Pa ya qualified Level 3 coach ka lir aser pai taoba mapang VVS Laxman nem teyari agütsüogo aser taoba küm India team Ireland-i oa asayaba mapang pa head coach liasü. Pa NCA staff ka asünung pa shilem mashika atem shimtetsü," ta source-isa shisem.

Taoba mapang Mumbai nungi asayar Nayar India team nung jenjang mejungi kümogo, aser pa ya asayar tejentem ali tashidang team nung inyaktetsü ta bilemer.

Australia nung oa asayaba mapang asayar tejen Sunil Gavaskar-i, Indian support staff shilem ashishi aser ashiba agi, Kholi amala asayari tanen makai aibelen kasa menaba atema parnok dak tai tongloksütsüla.

Tanga assistant coach tem rongnung taoba mapang South Africa nung pacer Morne Morkel aser Dutchman Ryan Ten Doeschate nata densema lir.

Australian Open: Swiatek & Fritz na 3buba round-i iogo



Aenjeti/January 16, 2025 (Agencies): Tang asaya aliba Australian Open tetsür kija asaya nung Bresthostibarnü Iga Swiatek-i Rebecca Sramkova koka tasembuba round-i iogo.

Swiatek-i tanabuba round asaya nung Rebecca Sramkova ya 6-0, 6-2 agi ayong ayonga koka liasü.

Second seed Swiatek-i Sramkova indang mezüngbuba service game break asü aser iba sülen tesülen meyipa mereprangi asaya koka liasü.

World number 49 Sramkova ya tang mezüngbuba Grand Slam ka nung tanabuba round asaya liasü aser lai Swiatek nem kecha telangzüba magütsütet.

Swiatek-i mezüngbuba set nung Sramkova indang first serve point shilem 64 akok aser lai point 10 dang agüja liasü.

Tasembuba round nung Swiatek taoba mapang US Open champion Emma Raducanu den asayatsü, shiba America tsür Amanda Anisimova kokogo.

Kasa asayamung tebur kija asaya nung America nung asayar Taylor Fritz-i Chile nung qualifier Cristian Garin ayong ayonga kokogo aser pa tasembuba round nung Gael Monfils den asayatsü.

Margaret Court Arena nung iba asaya ya Fritz-i minute 82 nung dang 6-2, 6-1, 6-0 agi koka liasü. Pai taküim iba asayamung

nung tang tashi nung game ti dang mekoki lir.

Mezüngbuba round nung pai Jenson Brooksby akokba mapang game pongu nung dang tamakok angu aser pa tang tashi nung ghonda asem shi dang asayar lir.

Iba asaya akokba sülen Fritz, arishi küm 38 tain France nung asayar Monfils den asayatsü, shibai Germany nung asayar Daniel Altmaier set asem toktepa asayaba sülen kokogo.

Andre Agassi-i 2003 küm Australia Open akokba sülen America nung rongnungi iba asayamung final tonga asayaba mezüngbuba asayar akümtsü atema Fritz merangdar.

RCB-i Sophie melena Charlie alizükogo

Aenjeti/January 16, 2025 (Agencies): Royal Challengers Bengaluru (RCB)-i Bresthostibarnü sangdong ka ajanga Sophie Molineux melena England tsür off-spinner Charlie Dean den tenangzüktepba yangluba sangdongogo.

Molineux ya yiruba ajanga taruba Women's Premier League (WPL) 2025 nung masayatetsüsa kümogo.

"Molineux temekok yiruba ajanga WPL tasembuba nung masayatetsü. Dean sen lakh 30 yong RCB nung adentsü," ta WPL-i sangdong ka ajanga metetdaksü.

Arishi küm 24 tain Dean ya bowling all-rounder ka lir, shiba England team nungi T20I 36, Test 3 aser ODI 39 nung asayaogo. Lai tang tashi nung format asemprongla nung wicket 122 agir lir.

2024 küm December ita

India team Australia-i oa asayaba sülen Molineux yiru aser la taruba season nung masayatetsü. Lai WPL 2024 nung RCB-W's atema tongtibang shilem agia lai asaya 10 nung wicket 12 agi aser la indang economy rate 7.31 liasü. Delhi Capitals den final asayaba mapang lai over ka nung wicket asem agia liasü.

2024 season nung Molineux den Asha Sobhana aser purple Cap angula Shreyanka Patil nungeri RCB-i title abenba nung tongtibang shilem agia liasü.

RCB Squad: Smriti Mandhana (c), Sabbini Meghana, Richa Ghosh (wk), Ellyse Perry, Georgia Wareham, Shreyanka Patil, Asha Sobhana, Sophie Devine, Renuka Singh, Sophie Molineux, Ekta Bisht, Kate Cross, Kanika Ahuja, Danni Wyatt-Hodge, Prema Rawat, Joshitha VJ, Raghvi Bist, aser Jagravi Pawar.

BILEMDANGANG

"Anogoji nai azüokang; anogo nem na tazüokdaksü."